

Festa a Scuol per l'ouvra da piunier Bogn Engiadina Scuol

Il Bogn Engiadina ha cumpli seis 25avel anniversari

A Chalandamarz 1993 ha drivi a Scuol il Bogn Engiadina sias portas. Daspö quella jada han fat var 5,5 milliuns giasts adöver da quista sporta, e quai eir dūrant las stagiuns mortas.

Al principi da december 1988 vaiva approvà il suveran da Scuol il credit necessari per laschar renascher in cumün la cultura da far bogns e curas. Il bogn existent chi d'eira gnü fabrichà da l'on 1878 vess stuvü gnir renovà, sias sportas nu correspundaivan plü a las aspetativas dal temp dad hoz. Il cumün da Scuol cun seis 2000 abitants ha investi passa 50 milliuns francs i'l Bogn Engiadina Scuol (BES).

«In quists 25 ons daspö cha'l BES exista han var 5,5 milliuns giasts fat adöver da nossa sportas», ha dit Gerhard Hauser, il directur dal BES in venderdi passà a chaschun da la festa da giubileum da 25 ons Bogn Engiadina. «Quai correspunda ad üna media da circa 600 giasts al di.» Pella festa chi'd es gnüda imbellida cun produziuns dal cor masdà e da la musica da Scuol e moderada dal cabarettist Flurin Caviezel d'eira gnü svödà il batschigl principal. Uschè d'eira lö per tadar ils plects dals differents oratuors. Ultra dal directur Hauser han discurrü Gion J. Fravi chi presidescha il cussagl administrativ dal BES, il capo da Scuol Christian Fanzun e seis antecessur ed uossa cusglie governativ Jon Domenic Parolini.


Optimà in divers regards la sporta
Tant Hauser sco eir Fravi han manzunà la necessitè da renovar ed optimar re-

gularmaing la sporta dal BES «per mantgnair uschè l'attractivitè dal bogn». Quai es gnü fat eir ingon: Per 2,5 milliuns francs sun gnüdas fattas las revisiuns ordinarias dals batschigls, introdüt ün sistem per pajar ed entrar cun agüd d'ün chip e renovadas las gardarobas. Quellas han uossa ün meglider ac-

cess per persunas handicapadas. Quai vala eir pel batschigl extern dal BES, qua es gnüda fabrichada üna rampa chi pussibilescha a persunas cun impediment l'access independent in quist batschigl.

«Eir scha'l Bogn Engiadina Scuol fa amo adüna deficit es el ün motor da

l'economia regionala e spordscha 40 piazzas da lavur i'l bogn sves ed ulteriuras 100 fin 150 piazzas chi nu dess scha'l BES nun existiss», han dit Fravi e Hauser ha manzunà l'effet cha'l bogn ha pel turissem regional: «Grazcha al BES s'haja giasts chi vegnan a Scuol dūrant tuot l'on, eir illa stagiun bassa, e



Il directur Gerhard Hauser, il capo Christian Fanzun e Gion J. Fravi chi presidescha il cussagl administrativ dal BES illas novas gardarobas (da schnestra).

fotografia: Flurin Andry

portan guadogn a butias, ustarias ed hotels.»

Il capo da Scuol, Christian Fanzun e'l cusglie governativ Jon Domenic Parolini han discurrü davart l'importanza dal BES our d'vista cumünala e chantunala. «Da fich grond'importanza nun es il bogn be pel turissem local e regional cun l'hotellaria e la parahotellaria, in quists 25 ons s'haja investi dudesch milliuns francs illa revisiun ed optimaziun dal BES. Quai ha dat blera lavur a las firmas indigenas», ha dit il capo e fat ün cumpliment als piuniers, l'antierur capo da Scuol Not Carl ed al suprastant cumünal da quella jada Duri Bezzola chi vaivan inizià quist projet.

Gniss fabrichà eir hoz amo il BES?

«Eu nu sa schi's vess hozindi eir il curaschi d'investir in ün tal projet.» Fanzun ha manzunà cha'l cumün da Scuol sustegna il BES daspö trais ons e fin dal 2020 cun üna contribuziun annuala dad 1,85 milliuns francs. Chi til fetscha grond plaschier ch'eir il cumün fusiunà da Scuol sustegna il BES, ha dit Jon Domenic Parolini, «il bogn e las pendicularas sun ils motors economics da la regiun. Daspö 25 ons es il BES relevant pel sistem, da quai as sun consciants il Chantun e la Regenza.» Chi saja important cha'ls respunsabels sajan averts per adattar davoman la sporta als bsögns dals giasts, ha dit Parolini ed agiunt: «L'aua es l'elemaint central da nossa regiun, avant 25 ons vaina inchaminà cul BES üna nouva via per trar a nüz darcheu quista forza regionala.» (anr/fa)

In venderdi, 1. gün, ha lö la 16ava radunanza generala ordinaria da la Bogn Engiadina Scuol (BES) SA il bogn a Scuol.